

& de conseruée a Calis ou Sainct Lucque en Espagne.

Le mesme Empereur y enuoya en l'an 1512. Iehan Ponce de Leon , lequel y estant arriué le iour de Pasque Fleurie la nomma Floride : Mais y estant retourné fust tué & mangé des Sauvages. Le Roy y depescha en l'année 1518. Jean Verazzano Italien , avec vne Flotte de Navires François , qui y furent aussi bien receus que les Espagnols y auoient esté malmenez par les pauvres Habitans , animez du bon Genye de leur Pays , qui les incitoit naturellement à aimer ce qui leur estoit propre , & à haïr ce qui leur estoit contraire.

L'Empereur y renuoya aussi tost dès la mesme année avec vn notable embarquement d'Espagnols qui y furent encor tuez & consommez comme les autres. Neantmoins obstinant cette Conqueste , & ne desirant que les François luy vinssent muetuer & accoster de si pres les Indes & la Mezicque , y depescha encor vn plus grand & fort embarquement en l'année 1522. conduit par Nicollas Vafque Daillon lequel y fut traité comme les autres Espagnols , qui obligea sa Majesté Tres-Christienne d'y renuoyer encor le mesme Verazzano en l'an 1524. qui y replanta encor vne fois le nom , les Armes , & les loix de France. Pourquoi l'Empereur fist equipper derechef en l'an 1527. vn quatriesme embarquement commandé par Pomphille de Narues qui partit de Sainct Lucque de Baramede avec vn plus grand equippage d'hommes & de Nauires qu'en eust encor fait , pour y entrer de force , mettre tout a feu & a sang , & se vanger des affronts qu'il y auoit auparauant receuz : mais s'estant mis en effect d'y entrer en execution de ce cruel & meschant dessein , Dieu permit qu'ils en sentirent la peine eux-mesme & qu'ils furent tous mis à mort par vn iuste Jugement de sa Maiesté diuine , Puis en l'an 1534. apres le decez de Verazzano le Roy y enuoya Jacques Cartier de Sainct Mallo